

«La faira cun la tschaira»

Nov film da la Televisiun Rumantscha

■ (anr/fa) En ses film tematisescha il cineast Arnold Rauch l'istorgia ed il svilup da la tschaira da skis. El lascha vegnir a pled experts skiunzs sco Bernhard Russi u Dumeng Giovanoli.

Ils 15 da favrer da l'onn 1970 a Val Gardena: Bernhard Russi daventa campiu mundial da la cursa rapida e chaschuna cun quai ina revoluziun en il svilup da la tschaira da skis. Tuts sa dumondan, pertge che Russi aveva già skis uschè sperts. Aveva'l profità d'ina tschaira miraculosa? Al cineast Arnold Rauch tradescha Russi il secret. En ses film che entschaiva cun la cursa surmenziunada a Val Gardena s'ha mess Arnold Rauch a la perscrutaziun dal svilup da la tschaira. Ses proxim infurmant è Dumeng Giovanoli.

Davart la magia dal tschairar ils skis

Il skiunz engiadinais aveva gudagnà ils 14 da schaner 1968 il slalom da Wengen ed in'emna pli tard er anc quel da Kitzbühel. En il film demonstrescha Giovanoli co ch'ins tschairava da quel temp ils skis. Ch'igl era schon baud in zic magic a badair suenter sin la pista quant spert ch'ils skis eran grazia a la tschaira chauda ch'ins aveva dà si cun il pinel, din el e Bernhard Russi independentamain. Gia 1916 era vegnida fundada ad Altstätten la firma Tobler&Co., pli tard Toko AG, che produciva tschaira per ils skis. Grazia a la recloma ch'il skiunz svizzer David Zogg (el era daventà 1931 l'emprim campiu mundial en la disciplina slalom) ha fatg per la firma era la tschaira da Toko per blers

onns la meglra. «Blers sa regordan da quel temp ch'ins deva si la tschaira da Toko avant che ir cun ils skis», din ils skiunzs en il film, «cur che la naiv era bletscha fascheva il 'silber' il meglia effect.» Suenter ina visita en la firma Toko, nua la chemicista rumantscha Jovita Cavegn declera la produziun da la tschaira è il cineast Arnold Rauch a Glion. Gian Marco Menzli da la butia Menzli Sport demonstrescha co ch'els skis vegnan tschairads ozendi: Ch'els hajan ordavant mo da programmar las maschinas, il rest fan quellas.

Datas d'emissiun: dumengia, ils 4 mars 2007 a las 17.25 sin SF1; mesemna, ils 7 mars, da las 08.40 – 14.00 sin SFinfo (alternant cun Kassensturz); sonda, ils 10 mars, a las 17.15 sin SF1; dumengia, ils 11 mars 2007, a las 07.40 sin TS11.

Las metodas da tschairar ils skis èn daventadas adina pli raffinadas.

MAD

